

Algo cu a wordo rechasa pa SAC su Raad van Beheer

'MUSICA' a pidi 25.000 florin delanta y pa hala fecha di prefinal y final di Calypso

ORANJESTAD – Fundacion MUSICA a pidi un suma cuantioso di placa y mas punto pa SAC cumpli cune siman pasa, pero cu SAC finalmente a rechasa rotundamente. Esaki a sali na cla ayera durante un conferencia di prensa unda cu SAC a dicidi di presenta e documentacion di tur e reunionnan cu a tuma lugar ultimo simannan entre e awor fundacion MUSICA, SAC y mediado di gobierno.

For di esaki, ta resalta cu durante un reunion cu a tuma lugar diabierna siman pasa dia 27, entre SAC, Gobierno y mediado di gobierno unda cu a trata varios punto. Entre nan, cu e musiconan a lanta un fundacion cu yama MUSICA. Pero e puntonan mas interesante tabata cu e fundacion a haci un peti-



cion pa SAC duna e fundacion un avance di 25.000 florin, y pa hala e evento di Hebe Hebe pa otro fecha. Esaki pa asina e fundacion por a organisa su evento magno riba e fecha ey.

Interesante ta cu e fecha cu ta wordo menciona ta dia 9 di februari, siendo cu segun presidente di SAC Tecla Kelly, e fecha di e

evento ey ta 15 di februari. Un otro exigencia di MUSICA na SAC tabata cu nan tabata kier un relato financiero di e contest di 2012 pa 15 di februari proximo, esta dos siman despues cu e festival a tuma lugar y prome cu e temporada termina.

Tambe MUSICA a sugerir pa inscripcion di e festival nobo tuma lugar dia 30 di januari, y e prefinal tuma

lugar dia 4 di februari pa, e final mes tuma lugar dia 9 di februari 2012.

Durante e reunion di SAC su Raad van Beheer un dia despues, esta diasabra 28, tur e puntonan presenta diabierna a wordo rechasa rotundamente. Esta cu no ta duna pago adelanta na

MUSICA, no ta duna resultado financiero dia 15 di februari, y no ta trece cambio na e fechanan di prefinal y final. Finalmente, SAC a mostra cu ayera merdia nan a presenta nan relato final na mediado di gobierno riba tur loke a wordo reuni ariba y dicidi. □

Si otorga fundacion MUSICA permiso pa evento carnavalesco otro siman

SAC lo demanda minister responsabel pa permiso otorga den corte

ORANJESTAD – Si e fundacion MUSICA of cualkier otro instancia haya un permiso awor pa organisa un actividad relaciona directamente cu carnaval, SAC lo demanda e mandatario responsabel pa e permiso duna. Esaki e presidente di SAC Tecla Kelly a declara ayera, den un intento pa muestra cu ta SAC ta e unico instancia durante temporada di carnaval cu por organisa eventonan relaciona directamente cu carnaval di Aruba.

Pues esaki ta nifica cu si gobierno di Aruba dicidi di otorga un permiso pa e evento di e fundacion MUSICA, cu SAC lo no basila pa demanda gobierno y minister, pa e acto aki. Esaki riba conseho di su abogadoonan, Kelly a bisa prensa ayera durante un conferencia di prensa pa relata detayenan no conoci ainda riba e impasse di Calypso cu tin tur hende den su gara pa mas di dos siman caba.

Segun Kelly, durante periodo di carnaval SAC ta e unico instancia cu por organisa eventonan relaciona directamente cu carnaval. Como tal si gobierno mester otorga un permiso pa p.e. e fundacion MUSICA, SAC lo hiba gobierno corte pa esaki. Cu e declaracion aki, e fundacion MUSICA su chensnan pa haya un permiso ta wordo poni cu lomba contra muraya mirando cu e por haya su mes sin permiso si gobierno honra e regla cu fin cu ta existi segun SAC a declara ayera.

Kelly a cuminsa pa muestra cu ningun momento SAC tabata y ta actuando di mala fe y cu esnan cu ta pensa y bisa esaki, no ta berdad y cu ta lamenta y desmenti esaki categoricamente. "SAC tur momento a traha pa busca un solucion pa e problema" Kelly a segura un y tur durante e conferencia.

Tambe e presidente di SAC a muestra cu awor cu

'oficialmente' e negociacionnan entre e partidonan a termina, ta etico pa por presenta tur documento di e negociacionnan cu a tuma luga e ultimo simannan. No a haci esaki prome debi cu esaki lo tabata eticamente incorrecto.

Asina Kelly a cuminsa repasa tur e puntonan sistematicamente, for di cual algun punto interesante a resalta. Entre otro cu ningun momento SAC a nega di reuni manera cu lo tabata aparenta, sino mas bien a reuni riba otro orarionan cu a wordo ofreci. Aki SAC ta muestra cu p.e. riba e diabierna siman pasa a bisa cu a ofrece orarionan den mainta pa reuni pero cu SAC no a aparece, pero no ta bisa cu e reunionnan a tuma luga si, pero riba otro orario. Y asina tin mas dia cu tabatin reunionnan pero riba otro ora cu a wordo ofreci, debi cu SAC no tabata por e orarionan stipula. □